

Fascia speta l nef dirigent per l Servije Mendranzes

L'é passà trei meis da canche Marco Viola à fenì sie lurier, l conseier Luigi Chiocchetti à domanà a la Provinzia de fèr la neva nomina

Mendranzes - Con la fin de november l dirigent del Servije per la promozion de la mendranzes linguistiches de la Provinzia autonoma de Trent, dr Marco Viola, é jìt en penscion. La nomina del nef dirigent no é amò stata fata e te chest trat de temp l servije ge é stat dat sù al capo del dipartiment afares e relaziuns istituzionèles dr Andrea Segatta. Amò apede l'orgnìch se à smendrà amò de più ajache ensemma con Viola l'é jìt en penscion enche la colaboradora del Servije, d.ra Lucia Maccani; ades i dependenc é resté

de cinch (e cater de chisc laora a mez temp) e no l'é amò stat pissà nience a troèr valugn che coure l post lascià vet. Per chesta rejons e per i cruzies che é stac palesé da man de la mendranzes linguistiches sul tegnir de la Provinzia de Trent, l conseier provinzièl ladin Luigi Chiocchetti ge à scrit na letra al president Lorenzo Dellai per ge domanèr che vegne nominà al più prest l nef dirigent acioche l servije posse meter jù sie program, tant politich che organisatif, de gran emportanza per ge stèr dō a na vida

efizienta a la encèries e la funziuns dates sù da la lege nr 6 del 2008.

"Se cognosc l moment delicat che é dō a passèr la mendranzes del Trentin aldò de la reforma istituzionèla - scrif Chiocchetti te sia letra. La neva lege che veit la Comunitàdes de val, e per la Val de Fascia, l Comun general, ge dèsc sù a la istituzions neva competenzes. Te chest moment donca l'é de gran emportanza poder aer en provinzia ponc de referiment segures e ben endrezé, che saesse sostegnir a na vida adatèda la neva realtèdes e l

svilup de si projec."

L Servije per la promozion de la mendranzes linguistiches de la provinzia de Trent l'é semper stat n muie vejìn e ascort ai besognes de la comunanzes, doventan, ensemma al dr Viola, n pont de referiment per duc chi che te la realtè de la mendranzes de lengaz, no demò locales, i à abù l besogn de na direzion o de n aiut calificà.

I travers arjont te chisc egn é stac n muie e de valuta. Apede a chi più emportanc a nivel politich, desche la lege su la mendranzes, l'é

ence i vijas te la Catalogna e te la Val d'Aran per ge dèr l met a nesc amistradores de cognoscer la realtè de etres raions de mendranza, o la fradaa linguistica con la mendranza Achuar te l'Ecuador.

L conseier Chiocchetti domana enche che vegne tegnù cont che te chesta fasa delicata fossa emportant che la persona a chela che ge vegnarà dat sù l'encèria aesse la competenzes tecniches ma enche la cognoscentes, la sensibilitè e l'atenzion autentiches per la realtèdes de mendranzes de noscia provinzia.

Aprovés l program per l informazion y i cursc de ladin

Sun proposta dl president Lorenzo Dellai él vegnù ametù a finanziament i intervenc per l'informazion per ladin y i cursc de ladin per ladinofons y no

Mendranzes - Tl cheder dles normes de defendura y de promozion dles mendranzes linguistiches, aldò dila proposta dl president Lorenzo Dellai, à la jonta provinziàla aprové chisc dis passés n program de intervent per l'informazion te lingaz de mendranza per l'ann 2011, per chel che vegnirà adoré les ressurses dl fond provinziàl per la defendura dles mendranzes.

Per l'2011 prevedì l program per l'informazion te lingaz de mendranza chisc intervenc: al comun de Luserna ti va l import anual de 60.500 euro per l sostegn di media "Di Sait vo Lusérn", "Zimbar Earde", "Dar Foldjo", sun na speisa ametuda de 66.000 euro; a la Union Generela di Ladins dles Dolomites l import anual de 60.000 euro per l foliet "La Usc di Ladins"; a l'Istitut Mochen l import de 49.500 euro per l sostegn ai media "Liaba Lait" y "Sim to en Bernstoler" sun na speisa ametuda de 54.000 euro; al Comun General de Fascia l import de 291.700 euro sun na speisa ametuda de 320.000 euro per l sostegn al program televisiv "Ercaboan", ai programs radiofonics "N bel bondì ladin", "Che metone

pa anché sora fech?", "Arianaves", "Notiziar Ladin" y ciomò d'autri; a la revista Gana - La Usc dles Ladines. Semper tl medem cheder à la jonta tout fora, sicche scomenciadiva de interes particular da amete a finanziament, la proposta dila Scuola de Fascia de mete a jì "Cursc de lingaz ladin" via per l'2011. Perchel ti él vegnù conzedù a la Scuola n contribut de 8.000 euro sun na speisa ametuda de 15.000 euro, con l obietif de ti asseguarè a insegnanc y dependenc publicas de arjonte les competenzes linguistiches de basa damanades per atuè les

funziuns prevedudes dal D.Lgs. 592/1993, con conscdiazion particulara per la doura dl ladin scrit y per les problematiches che ruva dai prozes de standardisazion y de normalisazion dl lingaz en doura. L projet prevedì cursc de alfabetisazion per ladin spartis te does sescions, una d'aisciuda (cursc de basa per ladinofons y no ladinofons) y una d'auton (cursc de nivel plu aut semper per ladinofons e no) con l sostegn dl Istitut Cultural Ladin, che é l'autoritè scientifica, y dl Comun general, che met a la leta l material didatich per fè i cursc.



L dirigent dl Servisc Mendranzes dila PAT Marco Viola y la presidenta dila Generela Elsa Zardini à renové da puech la convenzion per l sostegn de 60.000 euro anuai a La Usc di Ladins.

N nef simbol per l Comun de Ciampedel

L'aministrazion met a jir n concors de idees per studièr fora n logo artistich

L Comun de Ciampedel à metù fora n concors de idees con l'obietif de troèr n simbol nef per l pais e tel medem temp ge dèr l'ocajon a duc chi che vel tor pèrt de palesèr sia sensibilitè artistica. Cogn vegnir pervedù doi verscions del simbol, una per talian e una per ladin o enche na soula verscion per duc e doi i lengaz. L simbol l cogn poder vegnir adatà a desvalives formac (scartabile lonc de teila, tabelons, placac, codejìe) donca l cogn poder rejèr ensin a na dimenscion minima de 2 cm.

Al projet pel tor pèrt firmes, scoles e jent e l desegn del simbol l cogn vegnir portà dant te n format A2, te na soracuerta biencia senza nesciuna scritta o segn de recognoscent. Te chesta soracuerta, ensemma al desegn,

cognarè esser ite n'autra soracuerta biencia più picola, serèda, con ite n biliet con inom, inom de familia, direzion e numer de telefon e/o de posta elettronica de l'autor.

I projec cogn vegnir consegné te l'ofize protocol del Comun de Ciampedel, strèda Dolomites 44, dant dai 30 de mèrz. Se pel ence i manèr per racomanèda A/R, te chest cajo vegn tegnù bon l stempel de spedizion tel termen stabèl, aboncont, chel che vegn manà tras posta l cognarà ruèr te l'ofize protocol de comun dant dai 11 de oril.

Na comision de esperc per la valutazion di projec, nominèda aposta da la Jonta de comun, la valutarà i projec tras criteries de valutazion valives per duc e la metarà fora la graduatoria su l'albo

de comun, su l'albo telematic e sul sit del Comun, e ai venjidores ge vegnarà dat comunicazion a la direzion metuda dant.

I projec mané ite i restarà de proprietè del Comun che l podarà meter en esser mudamenc o adatamenc per sodesfèr i besognes de doura. I prumes trei dessegnes cernui vegnarà premié con n pest respetivamente de 500, 200 e 100 euro. La premiazion vegnarà fata te na manifestazion più inant e vegnarà enche endrezà na mostra olache vegnarà metù fora duta la operes che a tout pèrt.

L regolament del concors con duta la modalitèdes é a la leta te Comun de Ciampedel, telefon 0462.750330 o sul sit www.comune.campitellodifassa.tn.it.

Zircol culturale "I Luoghi della Parola"

A la descorda de l'enema te noscia valèdes

Acà béleche sie meis Gabriele Dellagioma da Pardac, joen lauréa en filosofia de 28 egn, l'à avert n nef zircol culturèl pissà per i joegn. L'à inom "I Luoghi della Parola" (www.iluoghidellaparola.it) e se trata "de n post ledech e autonom olache l joen podessa jir più pian, se fermèr en cajo, ciapèr fià e aer l temp e l derit de poder ge pissèr dō, per n moment, a chel che sozet entorn e a el."

"I Luoghi della Parola - disc Gabriele Dellagioma - te sia oferta didatica (Gropes de Dialogh e de Letura, Zenter de scutèda, Sala de Letura e Didament scolastic ai bec e ai tousc), se prejenta desche n lech olache l joen podessa - te na certa vida - se retroèr, fèr l pont de la situazion, delà da la tenjions che troon scialdi e de segur ti raporc vitai e formatives del tous: donca la Scuola e la Familia. Ge dèr la possibilitè de rejonèr de chel che ge interessa delbon, de chel che l vif e l sent daite, vel dir portèr dant n servije che al temp de la veia Grecia no l'era demò benvedù, ma retegñù indispensàbol per la formazion de n tous valent, autentic e responsàbol. La Filosofia coscì la é entenuda da nef desche enrescida e amor per chela Paroles, per chela Figures, per chi Sentimenc che sention sci dal fon. La Filosofia, no chela de la academies e nience chela del polver sun la soracuertes de libres, ma la Filosofia desche comprenjion e condivijion de la "fragilità" de l'om. Chest l'é chel che nos podassane e cognassane meter en jech e veder da nef!

Chisc Luoghi se svilupea donca entorn a chesta neva (ma veiora) maniera de dialoghèr, entorn a n barat de paroles che deida a crescer e madurèr, n lech che recorda la agorà greca, na piazza olache se posse se sentir da nef zitadins e rejonèr de chela dinamiches interiores che da temp aon desmentia e trat da na man, pissan che no les sie "giustes" per chisc egn, per noscia cultura scialdi più consumistica e egoista, per na spiritualità scialdi più soula e na fe dovènteda demò contegnidor de n Die semper più chiet e dalonc.

Jir ite te chisc Luoghi vel dir "recordèr", tegnir adiment chela Paroles per nos scì emportantes da valer na vita. Chesta l'é l'enema (psychè per i Greches): chel che ne forma desche omegn con nesc ac e

nesc destins. Coscita se pel ge averjèr i ujes a n servije nef e dassen ütöl per nesc tousc, n servije che é semper mençià chiò. Coscita se averc i ujes a chisc joegn che, con gran fadia e sacrificies, i à studià e i se à specialisà soralut per poder dapò jir de retorn te sia valèdes a portèr i benefizies de chel che i à emparà. Cognon no demò entener, ma enche meter en pràtega l pensier che "nesc tousc l'é nosc davegnir e negugn miec che ic podessa fèr fora nesc problemes de ades". L'é l'ora bona per entener che no l'é nescun specialist forest tant bon che la jent formèda del lech! Demò coscita se pel fèr front al mèl de chisc tempes, enche te noscia valèdes: l relativism dat da la globalisazion (psichica dant che economica).

No l'é più l temp - disc amò Dellagioma - de se creer demò "jent da la val"; massa l'é stat fat per se creer amò sci pures e sci vergines. Sion duc zitadins globai e gobalisé, enche se vegnon da valèdes anter la più beles de chest mond. Nosc dover l'èmben chel de tor coscienza del "coche" e del "cotant" sion mudé, de veder ti joegn l simbol e l spieie de chest mudament, de ge dèr na oportunitè de poder se fèr entener te manieres e lesc delvers e, tinùlta, de no creer che nosc ben e nosc mèl sie l medemo ence per nesc fies. L mond che cherdaane imutabol l'é mudà. Enche massa. Coscì no podon fèr auter che l entener, semper se volon se chiamèr amò "omegn" e no roboc. Coscì se vosc fi no l'é sci bon a scola, l beif o ensinamai l fuma, l ve respon malamente o, coche càpita più da spes, l'é imbarlumà o avelì, vardalo polito: aló l'é duta la distanza anter vosc mond (chel che cherdede scialdi "dret" e "giust" ma che no l'é più) e sia vita de duc i dis, ma soralut sia vida de entener n mond che, a paragon de chel de si genitores, l'é mudà patoch. L'é na neva paladina. No podon fèr n bel nia, se no ge pissèr; l'é coscita e bon.

Aboncont no se pel rejonèr de nichilism o relativism assoluc, ma de esser bogn de ge fèr front a na vida dassen neva: neves strumenc e neva forzes. Ma soralut na prospetiva zacàn laica. Demò coscita entenaron l viac che sion dō a fèr te e con noscia maraveoua valèdes. L'é demò na costion de cura e goern de Sé."